

**Ministarstvo za boračka pitanja  
Kantona Sarajevo**

Na osnovu člana 66. st. (1) i (2) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 12. stav (3) Zakona o dopunskim pravima boraca – branitelja Bosne i Hercegovine ("Službene novine Kantona Sarajevo", br. 31/22, 8/24 i 13/25), ministar za boračka pitanja Kantona Sarajevo donosi

**PRAVILNIK  
ZA UTVRĐIVANJE PRAVA NA BANJSKO I  
KLIMATSKO LIJEČENJE (MEDICINSKA  
REHABILITACIJA)****DIO I - OSNOVNE ODREDBE**

## Član 1.

(Predmet)

- (1) Ovim pravilnikom uređuju se korisnici prava, način i postupak ostvarivanja prava na banjsko i klimatsko liječenje (medicinsku rehabilitaciju), način i postupak podnošenja zahtjeva, obavezna dokumentacija, uvjeti, nadležnost ljekarske komisije, vremenski termini upućivanja na banjsko liječenje, prioriteta, realizacija, lista dijagnostificiranih oboljenja, način i postupak ostvarivanja prava na klimatsko liječenje i finansiranje prava, kao i druga pitanja od značaja za ostvarivanje prava na banjsko i klimatsko liječenje.
- (2) Pojam banjskog i klimatskog liječenja je definiran članom 11. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 31/22, 8/24 i 13/25), (u daljnjem tekstu: Zakon).

## Član 2.

(Korisnici prava)

- (1) Pravo na banjsko liječenje (medicinsku rehabilitaciju) mogu ostvariti:
  - a) članovi porodica šehida, članovi porodica poginulih, umrlih i nestalih branioca koji ostvaruju pravo na porodičnu invalidninu, ratni vojni invalidi i članovi porodice umrlih ratnih vojnih invalida koji ostvaruju pravo na ličnu ili porodičnu invalidninu,
  - b) dobitnici ratnih priznanja i odlikovanja i članovi porodica poginulih, umrlih i nestalih dobitnika ratnog priznanja i odlikovanja koji imaju priznato pravo na mjesečnu novčanu naknadu, demobilizirani branioci i mirmodopski vojni invalidi,
  - c) supružnici živih ratnih vojnih invalida, djeca živih ratnih vojnih invalida do 27 godine života ukoliko su na redovnom školovanju, a djeca živih ratnih vojnih invalida kojima je utvrđena nesposobnost za privređivanje od nadležnog organa pravo mogu ostvariti dok ta nesposobnost traje, roditelji ratnih vojnih invalida koji žive u zajedničkom domaćinstvu sa ratnim vojnim invalidom,
  - d) djeca šehida, poginulih, umrlih i nestalih branioca kojima je prestalo pravo na porodičnu invalidninu.
- (2) Pravo na klimatsko liječenje mogu ostvariti sva lica iz stava (1) ovog člana izuzev djece šehida i poginulih branioca kojima je prestalo pravo na porodičnu invalidninu.
- (3) Korisnici prava na banjsko liječenje (medicinsku rehabilitaciju) ili klimatsko liječenje, mogu koristiti ili pravo na banjsko ili pravo na klimatsko liječenje, izuzev ratnih vojnih invalida paraplegičara koji mogu u toku jedne godine ostvariti i banjsko i klimatsko liječenje.

## Član 3.

(Objava općeg javnog poziva)

Ministarstvo za boračka pitanja Kantona Sarajevo (u daljnjem tekstu: Ministarstvo) za svaku godinu objavljuje opći javni poziv za ostvarivanje prava branilačke populacije, od kojih je i pravo na banjsko liječenje (medicinsku rehabilitaciju) i klimatsko liječenje, po usvajanju Budžeta Kantona Sarajevo.

**DIO II - NAČIN I POSTUPAK OSTVARIVANJA PRAVA  
NA BANJSKO LIJEČENJE (MEDICINSKU  
REHABILITACIJU)**

## Član 4.

(Način podnošenja zahtjeva)

- (1) Zahtjev za ostvarivanje prava na banjsko liječenje (medicinsku rehabilitaciju) lica iz člana 2. ovog pravilnika podnosi se Ministarstvu, putem općinskih službi za boračko-invalidsku zaštitu (u daljnjem tekstu: općinska služba) općine na kojoj imaju prebivalište, izuzev ratnih vojnih invalida-paraplegičara koji zahtjev predaju Ministarstvu putem Udruženja ratnih vojnih invalida paraplegičara Kantona Sarajevo.
- (2) Zahtjevi za ostvarivanje prava iz stava (1) ovog člana se podnose svake godine i važe za budžetsku godinu u kojoj su podnijeti.
- (3) Zahtjev za obnovu i nastavak prava, uz pisanu izjavu da su činjenice i okolnosti na osnovu kojih je pravo priznato ostale nepromijenjene, podnose korisnici iz I grupe prioriteta definisanih u članu 11. ovog pravilnika koji su u prethodnoj budžetskoj godini ostvarili pravo, također putem općinskih službi općine na kojoj imaju prebivalište. Pisana izjava je sastavni dio zahtjeva.
- (4) Podnosilac zahtjeva može na zahtjevu iskazati želju za boravkom u određenom banjskom lječilištu, što će Ljekarska komisija uzeti u obzir posebno za I grupu prioriteta.

## Član 5.

(Obavezna dokumentacija za ostvarivanje prava na banjsko liječenje)

- (1) Obavezna dokumentacija koju dostavljaju podnosioci zahtjeva za ostvarivanje prava na banjsko liječenje je:
  - a) dokaz da lice ima status iz člana 2. Pravilnika:
    - 1) za demobiliziranog branioca - uvjerenje o vremenu provedenom u Oružanim snagama Republike Bosne i Hercegovine najmanje godinu dana, sa naznakom o postojanju ili nepostojanju okolnosti iz člana 36. "Zakona o pravima branilaca i članova njihovih porodica ("Službene novine Federacije BiH", br. 33/04, 56/05, 70/07, 9/10, 90/17, 29/22, 60/24 i 6/26)".
    - 2) za ratnog vojnog invalida - rješenje o ličnoj invalidnini - reviziono ili uvjerenje od službe za boračko invalidsku zaštitu da i dalje ostvaruje pravo na ličnu invalidninu,
    - 3) za članove porodica šehida, članove porodica poginulih, umrlih i nestalih branioca - rješenje o priznavanju prava na porodičnu invalidninu ili uvjerenje od službe za boračko invalidsku zaštitu da i dalje ostvaruje pravo na porodičnu invalidninu,
    - 4) za članove porodice umrlih ratnih vojnih invalida koji ostvaruju pravo na porodičnu invalidninu - rješenje o priznavanju prava na porodičnu invalidninu ili uvjerenje od službe za boračko

- invalidsku zaštitu da i dalje ostvaruje pravo na porodičnu invalidninu,
- 5) za dobitnike ratnih priznanja i odlikovanja - rješenje ili uvjerenje o ostvarivanju novčane naknade za dobitnike ratnih priznanja,
  - 6) za supružnike živih ratnih vojnih invalida – izvod iz matične knjige vjenčanih i uvjerenje za ratnog vojnog invalida da ostvaruje pravo na ličnu invalidninu,
  - 7) za djecu živih ratnih vojnih invalida – izvod iz matične knjige rođenih, potvrda ili uvjerenje o redovnom školovanju, rješenje nadležnog organa o nesposobnosti za privređivanje i uvjerenje za ratnog vojnog invalida o priznavanju prava na ličnu invalidninu,
  - 8) za roditelje ratnih vojnih invalida – izvod iz matične knjige rođenih za ratnog vojnog invalida, uvjerenje za ratnog vojnog invalida da ostvaruje pravo na ličnu invalidninu i prijava mjesta prebivališta za roditelja i za ratnog vojnog invalida,
  - 9) za mirmodopske vojne invalide – uvjerenje da ostvaruje pravo na ličnu invalidninu,
  - 10) za djecu šehida poginulih, umrlih i nestalih branioca kojima je prestalo pravo na porodičnu invalidninu- uvjerenje ili potvrda o statusu djeteta šehida, poginulog, umrlog ili nestalog branioca.
- b) medicinska dokumentacija,
- c) preporuka ljekara specijaliste iz zdravstvene ustanove u kojoj se podnosilac zahtjeva liječi, s tim da je uz svaku preporuku doktora specijaliste određene grane medicine potrebno napisati fizikalni status pacijenta (hod, obim pokretljivost zglobova, neurološki nalaz) i ostalo prema specijalnosti, da bi članovi Ljekarske komisije imali uvid u trenutno stanje pacijenta, sa izuzetkom pacijenata koji se upućuju na kardiorehabilitaciju. Preporuka ljekara specijaliste ne može biti starija od šest mjeseci, u momentu predavanja dokumentacije,
- d) prijava mjesta prebivališta - obavještenje.
- (2) Kao dokazi iz stava (1) ovog člana dostavljaju se originalni dokumenti ili ovjerene fotokopije, ne starije od šest mjeseci u momentu predavanja zahtjeva.
  - (3) Lica iz člana 4. stav (3) ovog pravilnika kada podnose zahtjev za obnovu i nastavak prava isti podnose bez dokumentacije propisane članom 5. stav (1) ovog pravilnika.

## Član 6.

(Uvjeti za ostvarivanje prava na banjsko liječenje - medicinsku rehabilitaciju)

- (1) Pravo na banjsko liječenje (medicinsku rehabilitaciju) mogu ostvariti lica iz člana 2. ovog pravilnika pod uvjetom da se kod tih lica radi o liječenju koje je neophodno kao nastavak liječenja od zadobijene rane, povrede, ozljede ili bolesti koji su propisani kao indikacija za to liječenje, a koje se obavlja u odgovarajućim zdravstvenim ustanovama - banjskim lječilištima.
- (2) Pojam lječilišta je definisan članom 159. Pravilnika o bližim uvjetima prostora, opreme i kadra za osnivanje i obavljanje zdravstvene djelatnosti u zdravstvenim ustanovama ("Službene novine Federacije BiH", br. 5/20 i 1/26) i članom

106. Zakona o zdravstvenoj zaštiti ("Službene novine Federacije BiH", br. 46/10 i 75/13).

- (3) Pravo na banjsko i klimatsko liječenje (medicinsku rehabilitaciju) se može ostvariti pod uvjetom da podnosioci zahtjeva imaju prebivalište na području Kantona Sarajevo.

## Član 7.

(Ljekarska komisija nadležna za odlučivanje)

- (1) O potrebi za banjskim liječenjem (medicinskom rehabilitacijom), na osnovu zahtjeva i obavezne dokumentacije iz člana 5. ovog pravilnika odlučuje Ljekarska komisija.
- (2) Ljekarsku komisiju imenuje ministar za boračka pitanja Kantona Sarajevo u sastavu od tri ljekara specijaliste (ortoped, neurolog i reumatolog) i sekretara komisije bez prava odlučivanja.
- (3) Ljekarska komisija donosi Poslovnik o radu.
- (4) Odluke Ljekarske komisije moraju biti potpisane od najmanje dva člana komisije, sa obaveznom naznakom reda prioriteta upućivanja na banjsko liječenje (medicinsku rehabilitaciju), a u slučaju odbijanja zahtjeva odluke moraju sadržavati razloge odbijanja.
- (5) Ljekarska komisija o svom radu izvještava Ministarstvo, najmanje jednom mjesečno.

## Član 8.

(Postupak za ostvarivanje prava)

- (1) Kompletiran zahtjev općinska služba prosljeđuje Ministarstvu, koje ga dostavlja na odlučivanje Ljekarskoj komisiji. Općinska služba provjerava i utvrđuje formalnu potpunost zahtjeva i ispunjenost propisanih pravnih uvjeta. Zahtjevi se u Ministarstvu pregledaju i ljekarski obrađuju po hronologiji dostavljanja od strane općinskih službi.
- (2) Općina pojedinačne zahtjeve za obnovu i nastavak korištenja prava ne dostavlja Ministarstvu, nego dostavlja spisak korisnika I grupe prioriteta koji su obnovili zahtjeve.
- (3) Odluke Ljekarske komisije o upućivanju na banjsko liječenje (medicinsku rehabilitaciju) ili o odbijanju zahtjeva, Ministarstvo uz dokumentaciju vraća općinskoj službi.
- (4) Ljekarska komisija prilikom odlučivanja utvrđuje I, II ili III grupu prioriteta za upućivanje u banjsko lječilište na osnovu težine zdravstvenog stanja, dokazane preporukom specijaliste i medicinskom dokumentacijom.
- (5) Općinska služba na pogodan način obavještava podnosioca zahtjeva kome je odobreno banjsko liječenje sa obaveznom naznakom kojoj grupi prioriteta pripada, a onima kojima je zahtjev odbijen obavezno upućuju pisani akt sa razlozima odbijanja. Općinska služba u svakom trenutku ima informacije o stanju predmeta koje je dužna pružiti podnosiocima zahtjeva.
- (6) Kada općinska služba utvrdi da podnosilac zahtjeva ne ispunjava uvjete propisane Zakonom i ovim pravilnikom za ostvarivanje prava na banjsko liječenje (medicinsku rehabilitaciju) donosi pisani akt kojim odbija zahtjev podnosioca, a koji može u roku od 15 dana od dana prijema akta, neposredno ili putem općinske službe podnijeti žalbu Ministarstvu.
- (7) Podnosioci zahtjeva koji su nezadovoljni odlukom Ljekarske komisije, mogu u roku od 15 dana od prijema obavijesti, neposredno ili putem općinske službe podnijeti žalbu Ministarstvu. Žalba mora biti obrazložena, uz eventualno dostavljanje novih dokaza i mišljenja ljekara specijaliste iz zdravstvene ustanove koji je dao preporuku za ovu vrstu liječenja.

- (8) Po žalbi iz st. (6) i (7) ovog člana rješava Ministarstvo, pri čemu se kod rješavanja žalbi iz stava (7) ovog člana obavezno pribavlja konačno mišljenje Ljekarske komisije.

## Član 9.

(Nastavak korištenja prava na banjsko i klimatsko liječenje, kontinuitet i redosljed prioriteta)

- (1) Korisnici iz I grupe prioriteta definisanih u članu 11. ovog pravilnika koji su u prethodnoj budžetskoj godini ostvarili pravo po ovom pravilniku, nastavljaju korištenje tog prava u tekućoj godini, bez ponovnog provođenja cjelokupnog postupka, pod uvjetom da se nisu promijenile okolnosti koje su bile osnov za priznavanje prava.
- (2) Ministarstvo početkom svake godine objavljuje na svojoj internet stranici listu korisnika I grupe prioriteta koji su u prethodnoj godini ostvarili pravo na banjsko i klimatsko liječenje, te istu dostavlja razvrstanu svakoj općinskoj službi koja treba ažurirati svoju općinsku listu i upoznati korisnike da podnesu zahtjev za nastavak prava.
- (3) Korisnici iz stava (1) ovog člana podnose zahtjev za obnovu i nastavak prava, uz pisanu izjavu da su činjenice i okolnosti na osnovu kojih je pravo priznato ostale nepromijenjene.
- (4) Prava iz stava (1) ovog člana mogu se nastaviti koristiti samo naredne godine, računajući od godine prvog priznavanja prava.
- (5) Ukoliko korisnik ne podnese zahtjev za nastavak prava u prvoj narednoj budžetskoj godini, gubi kontinuitet korištenja prava i dužan je podnijeti novi zahtjev uz kompletnu dokumentaciju, uključujući relevantnu medicinsku dokumentaciju, radi ponovne ocjene ispunjavanja uvjeta.
- (6) Nakon isteka perioda iz stava (4) ovog člana, korisnik je dužan podnijeti novi zahtjev za ostvarivanje prava, uz priloženu relevantnu medicinsku dokumentaciju, radi ponovne ocjene ispunjavanja uvjeta.
- (7) U postupcima iz st. (5) i (6) ovog člana nadležni organ provodi potpun postupak utvrđivanja činjeničnog stanja u skladu sa Zakonom o upravnom postupku ("Službene novine Federacije BiH", br. 2/98, 48/99 i 61/22).
- (8) Lica određena u II grupi prioriteta ostvaruju pravo nakon realizacije prava korisnika iz I grupe prioriteta, i to prema sljedećem redosljedu prioriteta:
  - a) prednost imaju lica koja nisu ostvarila pravo u prethodnoj budžetskoj godini,
  - b) unutar iste kategorije, redosljed se utvrđuje prema hronologiji podnošenja urednih zahtjeva.
- (9) Lica određena u III grupi prioriteta razmatraju se i realizuju pravo nakon realizacije prava korisnika iz I i II grupe prioriteta.
- (10) Ostvarivanje prava iz st. (7) i (8) ovog člana vrši se u skladu sa raspoloživim budžetskim sredstvima za tekuću budžetsku godinu.
- (11) Ministarstvo zadržava pravo provjere tačnosti izjave iz stava (3) ovog člana po službenoj dužnosti te, ukoliko se utvrdi da su podaci iz izjave korisnika iz stava 3. ovog člana netačni, isti moraju dostaviti dokumentaciju propisanu članom 5. stav (1) ovog pravilnika.
- (12) Ministarstvo zadržava pravo da po preporuci Ljekarske komisije može za određenog korisnika tražiti svake godine medicinsku dokumentaciju, što će biti naznačeno u odluci koju donosi Ljekarska komisija.

## Član 10.

(Prioriteti pri ostvarivanju prava)

- (1) Prioriteti za ostvarivanje prava na banjsko liječenje (medicinsku rehabilitaciju) za lica iz člana 2. ovog pravilnika, koja ispunjavanju uvjete propisane Zakonom i ovim pravilnikom utvrđuju se kako slijedi:
  - a) Ratni vojni invalidi -paraplegičari, zajedno sa pratiocem, jednom godišnje u trajanju od 21 dan, bez obzira na medicinski nalaz,
  - b) podnosioci zahtjeva sa Ljekarskom preporukom koja sadrži prijedlog za nastavak liječenja,
  - c) podnosioci zahtjeva sa potrebom poboljšanja ili održavanja trenutnog zdravstvenog stanja, prvenstveno visoke amputacije donjih ekstremiteta, a zatim ostali podnosioci zahtjeva u odnosu na težinu zdravstvenog stanja i izražene potrebe iz upute ljekara specijaliste.
- (2) Ljekarska komisija, prilikom odlučivanja o upućivanju na banjsko liječenje, utvrđuje prioritete grupe na osnovu medicinskih indikacija, težine zdravstvenog stanja i drugih relevantnih okolnosti. U okviru prioritete grupe koju utvrdi Ljekarska komisija, prednost imaju ratni vojni invalidi, kao i dobitnici ratnih priznanja i odlikovanja, ukoliko nisu prethodne godine ostvarili pravo.

## Član 11.

(Vremenski termini upućivanja na banjsko liječenje)

- (1) Vremenske termine (dan i mjesec) upućivanja korisnika ovog prava u banjska lječilišta planira Ministarstvo u dogovoru sa banjskim lječilištima i općinskim službama uz konsultaciju sa korisnikom.
- (2) Trajanje banjskog liječenja (medicinske rehabilitacije) je do 14 dana prema odluci Ljekarske komisije, osim za ratne vojne invalide-paraplegičare u trajanju od 21 dan, a trajanje klimatskog liječenja je do sedam dana.
- (3) Pravo na banjsko liječenje (medicinsku rehabilitaciju) odobrava se u pravilu jednom u toku godine, a prednost u ostvarivanju prava u okviru iste grupe prioriteta koju odredi Ljekarska komisija imaju oni podnosioci zahtjeva koji u prethodnoj godini nisu ostvarili ovo pravo.

## Član 12.

(Lista dijagnosticiranih oboljenja razvrstanih po grupama prioriteta upućivanja na banjsko liječenje)

- (1) Ljekarska komisija upućivanje na banjsko liječenje (medicinsku rehabilitaciju) prvenstveno vrši po osnovu sljedeće liste dijagnosticiranih oboljenja:
  - a) sistemske bolesti vezivnog tkiva (sistemska lupus eritematodes, reumatoidni artritis, seronegativne artropatije, ukoliko je prisutan izraženi spazam muskulature, kontrakture zglobova, otežani hod, umanjenje aktivnosti svakodnevnog života, a nakon sprovedenog fizikalnog tretmana ambulantog tipa, isključivo po preporuci fizijatra ili reumatologa), svrstavaju se u I grupu prioriteta,
  - b) stanja nakon amputacije ekstremiteta i dijelova ekstremiteta, uz nalaz ortopeda, traumatologa, svrstavaju se u I grupu prioriteta,
  - c) stanja nakon implantacije endoproteza i korektivne osteotomije ramena, kuka i koljena do dvije godine nakon operacije, samo nakon kontrolnog pregleda operatera i prema njegovoj preporuci. Liječenje se može realizirati odmah nakon obavljenog bolničkog

- tretmana, a uz preporuku ortopeda, traumatologa, reumatologa, svrstavaju se u I grupu prioriteta,
- d) stanja nakon teških povreda kičme sa neurološkim deficitom - svrstavaju se u I grupu prioriteta,
- e) stanja nakon prijeloma kralježaka i karlice (prijelomi kralježaka bez neurološkog deficita) do dvije godine nakon prijeloma, svrstavaju se u I grupu prioriteta,
- f) stanja nakon povreda ligamentarnog aparata velikih zglobova (rame, lakat, ručni zglob, koljeno i skočni zglob), tretiranih operativno, te prijeloma gornjih i donjih ekstremiteta, tretiranih konzervativno ili operativno, uz nalaz ortopeda ili traumatologa, u slučaju zaostalih kontraktura ili eventualnih lezija perifernih nerava do dvije godine nakon prijeloma, svrstavaju se u I grupu prioriteta,
- g) kontrakture zglobova ekstremiteta nakon traume i opekotina do dvije godine nakon operacije, svrstavaju se u I grupu prioriteta,
- h) stanja nakon operativnog liječenja promjena na kičmenom stubu (hernije intervertebralnog diska, stenoze vertebralnog kanala, skolioze, kifoze i upale) - do dvije godine nakon operacije, svrstavaju se u I grupu prioriteta,
- i) stanja koja zahtijevaju kardiorehabilitaciju: stanje poslije CABG, korekcije ili zamjene srčanih zalistaka vještačkim, stanja nakon korekcije kongenitalnih mana srca i transplantacije srca, isključivo po preporuci i nalazu kardiologa, kardiologa i interniste, a u prvoj godini nakon sprovedenog kardiohirurškog tretmana, svrstavaju se u I grupu prioriteta,
- j) degenerativni procesi - osteoartroze kukova i koljena (koksartroza i gonartroza), građirana isključivo kao teška, CT ili MRI verificirana, uz nalaz reumatologa ili ortopeda, a po preporuci fizijatra, reumatologa i ortopeda i nakon što su iscrpljene ambulantne mogućnosti liječenja, svrstavaju se u II grupu prioriteta,
- k) diskopatije, samo kada uobičajena fizikalna terapija nije uspjela ublažiti simptome ni nakon šest sedmica ambulantnog tretmana, prema nalazu neurohirurga, ortopeda, neurologa, reumatologa ili fizijatra, svrstavaju se u II grupu prioriteta,
- l) progresivne hronične neurološke bolesti – multipla skleroza, parkinsonova bolest, amiotrofička lateralna skleroza, mijastenija gravis, sekvele akutnog poliradikuloneuritisa, sekvele transverzalnog mijelitisa, hronična inflamatorna demijelinizirajuća polineuropatija, metaboličke i ostale polineuropatije, pareze ili paralize perifernih nerava gornjih ili donjih ekstremiteta (do dvije godine od postavljanja dijagnoze), stanja nakon traume ili operacije mozga sa neurološkim deficitom (do dvije godine od postavljanja dijagnoze), stanja nakon moždanog udara sa neurološkim deficitom (do dvije godine od postavljanja dijagnoze) i ratni vojni invalidi kod kojih je utvrđeno oštećenje organizma od 80%, 90% ili 100%, svrstavaju se u I grupu prioriteta,
- m) radikulopatije (vratna, grudna i lumbosakralna) bez neurološkog ispada, vratni i lumbosakralni sindromi radiološki objektivizirani, stanje nakon moždanog udara sa neurološkim deficitom, operacije mozga ili kičmenog stuba (preko dvije godine nakon postavljanja dijagnoze), svrstavaju se u II grupu prioriteta,
- n) bolni sindromi bez radiološke objektivizacije, radikulopatije sa dobrim oporavkom nakon ambulantnog fizikalnog liječenja, svrstavaju se u III grupu prioriteta.
- (2) Oboljenja iz tač. c), d), e), f), g), h) i i) ovog stava nakon dvije godine ovisno o kliničkom statusu na nalazu, svrstavaju se u II odnosno III grupu prioriteta.
- (3) Izuzetno od liste iz st. (1) i (2) ovog člana, Ljekarska komisija može odobriti podnosiocu zahtjeva banjsko liječenje i ukoliko nisu navedene gore navedene dijagnoze, pod uslovom da za takvo liječenje ne postoje kontraindikacije i da bi banjsko liječenje moglo povoljno uticati na liječenje postojećeg oboljenja.
- (4) Ljekarska komisija određuje pripadnost podnosioca zahtjeva I, II ili III prioritetnoj grupi na osnovu stručne procjene zdravstvenog stanja, uzimajući u obzir naročito stepen akutnosti, težinu i stadij oboljenja, funkcionalno oštećenje, rizik od pogoršanja i potrebu za rehabilitacijom.

## Član 13.

(Kontraindikacije za upućivanje lica na banjsko liječenje)

- (1) Opće kontraindikacije za upućivanje lica na banjsko liječenje:
- akutna i subakutna stanja bolesti,
  - infektivna i parazitarna oboljenja, kliconoštvo,
  - postojanje mogućnosti pogoršanja osnovne bolesti,
  - akutni hronični psihosindrom i poremećaj ličnosti,
  - bolesti ovisnosti,
  - spolno prenosive bolesti,
  - progredijentna neurološka oboljenja u fazi akutnih pogoršanja,
  - graviditet,
  - srčana dekompenzacija,
  - maligni poremećaji srčanog ritma i netretirane fibrilacije atrijske,
  - bolesti metabolizma u poodmaklom stadiju,
  - aktivna TBC,
  - krvarenje bilo kog porijekla.
- (2) Specijalne kontraindikacije za upućivanje lica na banjsko liječenje:
- kardiovaskularna oboljenja koja uključuju:
    - poremećaj srčanog ritma poslije infarkta miokarda,
    - potpuni AV blok,
    - uznapredovala ateroskleroza,
    - cor pulmonale sa srčanom dekompenzacijom,
    - ishemična kardiomiopatija,
    - pacijenti sa ugrađenim pace makerom prva tri mjeseca od ugrađivanja,
    - tromboflebitis,
  - respiratorna oboljenja koja uključuju:
    - respiratorne insuficijencije i dekompenzacije,
    - boeckova bolest,
    - bronhalna astma u fazi napada,
    - sve akutne egzacerbacije respiratornih oboljenja.
  - gastrointestinalna oboljenja koja uključuju:
    - čir na želucu u fazi krvarenja,
    - ulcerozni kolitis i iritabilni kolon,
    - hidrops i empijem žučne kese.
  - bolesti bubrega i mokraćnih puteva koja uključuju:

- 1) nefritis akutni, cistopielitis akutni, pijelonefritis akutni,
- 2) parenhimatozna oštećenja bubrega,
- 3) bubrežna insuficijencija,
- e) neuropsihijatrijska oboljenja koja uključuju:
  - 1) organski psihosindrom,
  - 2) promjena ličnosti usljed atrofije mozga,
- f) ginekološka oboljenja koja uključuju:
  - 1) aciklična genitalna krvarenja,
- g) oboljenja lokomotornog aparata koja uključuju:
  - 1) akutizacija reumatoidnog artritisa,
  - 2) definitivna ankiloza, osim ukoliko je operisan drugi zglob,
  - 3) oboljenja metabolizma sa promjenama u zglobovima,
- h) endokrina i druga oboljenja koja uključuju:
  - 1) dekompenzirane forme dijabetesa,
  - 2) kasne komplikacije dijabetesa,
  - 3) maligna oboljenja krvi,
  - 4) ulcus cruris.
- (3) Ukoliko je podnosilac zahtjeva kardiovaskularni, respiratorni, nefrološki, gastrointestinalni, neuropsihijatrijski i ginekološki pacijent neophodno je u medicinskoj dokumentaciji dostaviti nalaz date specijalnosti ili subspecijalnosti sa naznakom da ne postoji kontraindikacija za obavljanje balneofizikalnog tretmana ili potvrdu nadležnog porodičnog ljekara da se ne liječi od oboljenja navedenih u kontraindikacionom polju liječenja.
- (4) Izbor banjškog lječilišta Ministarstvo vrši u skladu sa propisima iz oblasti javnih nabavki.

### DIO III - NAČIN I POSTUPAK OSTVARIVANJA PRAVA NA KLIMATSKO LIJEČENJE

#### Član 14.

(Način i postupak ostvarivanja prava na klimatsko liječenje)

Pravo na klimatsko liječenje lica iz člana 2. ovog pravilnika ostvaruju na način propisan odredbama čl. 4., 5., 6., 7., 8., 9., 10. 11. i 12. ovog pravilnika, po preporuci ordinirajućeg ljekara.

#### Član 15.

(Realizacija prava na klimatsko liječenje)

- (1) Klimatsko liječenje provodi se u ustanovama i privrednim društvima osnovanim za liječenje, odmor i rekreaciju u kojima se u liječenju primjenjuje prirodni faktor.
- (2) Objekti u kojima se klimatsko liječenje provodi moraju zadovoljavati odgovarajuće klimatske uslove, biti adekvatni za korisnike iz branilačkih kategorija sa ratnim i postratnim traumama, te prilagođeni i potrebama invalidnih lica.
- (3) Ministarstvo zaključuje ugovore o klimatskom liječenju-rehabilitaciji sa ustanovama i privrednim društvima u skladu sa propisima iz oblasti javnih nabavki.
- (4) Ugovorima iz stava (3) ovog člana naročito se utvrđuje obim i kvalitet zdravstvenih i drugih usluga koje te ustanove i privredna društva pružaju korisnicima, cijene tih usluga i druga međusobna prava i obaveze.

### DIO IV – FINANSIRANJE I OBUSTAVA

#### Član 16.

(Finansiranje prava na banjško i klimatsko liječenje)

Finansiranje prava iz ovog pravilnika za svaku godinu obezbjeđuje se do visine sredstava odobrenih za ove namjene u Budžetu Kantona Sarajevo.

#### Član 17.

(Obustava zaprimanja zahtjeva)

- (1) Ministarstvo zadržava pravo da može obustaviti zaprimanje zahtjeva za ostvarivanje prava na banjško i klimatsko liječenje, ako je zaprimljen veći broj zahtjeva u odnosu na predviđena budžetska sredstva za ovu namjenu, u skladu sa procjenom, strukturom i dinamikom potrošnje, izuzev za teže i urgentne slučajeve, obzirom da se pravo na banjško i klimatsko liječenje ostvaruje u skladu sa raspoloživim budžetskim sredstvima.
- (2) Obustava zaprimanja zahtjeva se objavljuje na internet stranici Ministarstva i na oglasnoj ploči radi transparentnosti.

### DIO V - PRIJELAZNE I ZAVRŠNE ODREDBE

#### Član 18.

(Prijelazne odredbe)

- (1) Ljekarska komisija je dužna u roku od 30 dana usaglasiti svoj poslovnik o radu sa odredbama ovog pravilnika.
- (2) Postupci za ostvarivanje ovog prava koji su započeti do dana stupanja na snagu ovog pravilnika, okončat će se po odredbama ovog pravilnika.

#### Član 19.

(Prestanak važenja ranijeg propisa)

Danom stupanja na snagu ovog pravilnika prestaje da važi Pravilnik za utvrđivanje prava na banjško i klimatsko liječenje (medicinska rehabilitacija) ("Službene novine Kantona Sarajevo", br. 9/21 i 7/24).

#### Član 20.

(Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Kantona Sarajevo".

Broj 06-02-6729/26

13. marta 2026. godine  
Sarajevo

Ministar  
Dr. sc. **Omer Osmanović**, s. r.

Na osnovu člana 66. st. (1) i (2) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 56. stav (4) Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 31/22, 8/24 i 13/25), ministar za boračka pitanja Kantona Sarajevo donosi

### PRAVILNIK

#### ZA UTVRĐIVANJE PRAVA NA DODJELU JEDNOKRATNE NOVČANE POMOĆI

### DIO PRVI - OSNOVNE ODREDBE

#### Član 1.

(Predmet)

Ovim pravilnikom uređuju se korisnici i vidovi ostvarivanja prava na dodjelu jedнокratne novčane pomoći, postupak ostvarivanja prava, uvjeti i kriteriji za ostvarivanje pojedinih vidova prava na jedнокratnu novčanu pomoć, plaćanje dijela troškova vanrednog školovanja i paralelnog samofinansirajućeg, plaćanje dijela troškova II i III ciklusa Bolonjskog sistema studija, dodjela novčanih sredstava za rješavanje socijalnih potreba, plaćanje troškova stanarine, pomoć osumnjičenim i optuženim bivšim pripadnicima Oružanih snaga Republike Bosne i Hercegovine (u daljnjem tekstu: Oružane snage R BiH) u predmetima ratnih zločina do pravosnažnosti presude, kao i članovima njihovih porodica i druga pitanja od značaja za